



**Illoqarfinni nunaqarfinnilu, immap tinittarnera ulerujussuarterneralu pillugit, angallatinut umiarsuarnullu talittarfiit qarsunneqartaleriartuinnarneri, isumannaannerusumik aaqqissuunneqarnissaat siunertaralugu, EM2021-mut naammassereersimasussamik Naalakkersuisut pilersaarusoqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Siverth K. Heilmann, Atassut)

(siullermeerneqarnera)

Demokraatit eqqaasitsissutigerusuppaat, umiarsualiviit talittarfiillu "2017-2027-imut umiarsualivinnut pilersaarut ingerlatarineqarmat, Inatsisartunit akuerineqarsimasumit.

Taamaattumik marloriaammik sulinertut taaneqarsinnaavoq, ilassutitut iliuusissatut pilersaarummik sanasoqassappat, soorlu maani Atassummit siunnersuutigineqartoq.

Demokraatit isumaqarput, pilersaarusiaq taanna umiarsualiviit talittarfiillu aqunneqarnerannut naammattoq.

Taamatut oqareerluta, Naalakkersuisut kajumissaassavagut eqqumaffigeqqullugit ajornartorsiutit, siunnersuuteqartut taakkartugaat. Pinaveersaartitsineq pitsaanerujuaannarpoq, nalilerneqaraluarpat, piffiit arlaanni qarsutsinissamut ulorianartorsiortoqartoq, naleqqutissaaq piffinni taakkunani pinaveersaartitsinissamut iliuuseqarnissaq.

Taamatut oqaaseqarluta siunnersuutip itigartinneqarnissaa innersuussutigineqarpoq.